

حضرت عیسیٰ کی شہید کرنے نا منصوبہ

22¹ بے خمیری روٹی آلی عید جسی عیدِ ربائی
وی آخٹے اُن، اچھٹے آلی سی۔² بڑے مذہبی

پیشوا تے شریعت نے عالم حضرت عیسیٰ کی شہید
کرنے نا منصوبہ بٹان لغے، پر او اس گل کی سوچی
کے ڈرنے سن کہ ”عوام پر اس گل نا اثر گے ہوسی؟“
³ فر اسرح ہویا کہ یہوداہ اسگریوتی نے دلے وچ شیطان
آئی گیا، جیہڑا کہ حضرت عیسیٰ نے باراں صحابیاں
وچوں ہی سی۔⁴ اُس گے کیتا کہ بڑے مذہبی پیشواواں
تے بڑے عبادت خانے نی حفاظت کرنے آئے سپاہیاں نے
آفسراں نال مشورہ کیتا، کہ کسرح حضرت عیسیٰ کی
اُنہاں نے حوالے کرے۔⁵ او لوک بہوں خوش ہوئے تے
اُنہاں یہوداہ کی پیسے دیٹے نی پیشکش کیتی۔⁶ یہوداہ
کی اُنہاں نی پیشکش پسند آئی تے منی گیا۔ اس تون
بعد او کسے ایٹے جہے موقعے نی تلاش وچ ہوئی گیا
کہ کسے کی پتہ لغٹے تون بغیر اے کم کری شوڑے۔

حضرت عیسیٰ عیدِ ربائی نی تیاری کرائے ان

7 جس ویلے عیدِ ربائی نا دیہاڑا آیا، جس اپر بنی اسرائیلیاں نے ہر خاندان نے لوکاں کی اپٹے واسطے اک اک لیا کوہٹا چاہی نا سی،⁸ تے حضرت عیسیٰ حضرت پطرس تے یوحنا کی اے گل آخی کے پھیجیا، ”جاؤ تے آساں واسطے عیدی نا کھاٹا تیار کرو۔“

9 صحابیاں پُچھیا، ”تساں نا گے خیال آے، کھاٹا آساں کتھے تیار گراں؟“

10 حضرت عیسیٰ انہاں کی آخیا، ”جیہڑے ویلے تساں شہر وچ جاسو تے اُتھے تساں کی اک بندہ لبھسی جیہڑا پاٹیئے نا گہڑا چائی کے تڑنا ہوسی۔ او جس کھار جاسی تساں وی اُس نے پچھے پچھے تری جاؤ۔¹¹ اُتھے جائی کے گہرے نے مالکے کی مہاڑا آخو کہ، ’اُستاد جی پُچھئے ان، مہمان خانہ کتھے آے جتھے میں تے مہاڑے ساتھی عیدی نی روٹی کھاساں؟‘¹² او بندہ آپوں تساں کی اپری منزل اپر کھڑی کے اک بڑا کمرہ دسی، جیہڑا آساں واسطے بلکل تیار ہوسی۔ تساں روٹی

اُتھے ہی تیار کرو۔“¹³ فر صحابی ٹری گئے تے جسرح حضرت عیسیٰ اُنہاں کی دسیا سی، سب کُجھ اُسرَح ہی ہویا۔ تے اُنہاں اُتھے ربائی نی عیدی نا کھاٹا تیار کیتا۔

حضرت عیسیٰ اپنئے صحابیاں نال آخری دفعہ روٹی کھاٹے ان

¹⁴ جیہڑے ویلے عید نے کھاٹے نا وقت ہویا تے حضرت عیسیٰ اپنئے صحابیاں نال کھاٹا کھاٹے واسطے دسترخوان اپر بیٹھے،¹⁵ تے اُنہاں اپنئے صحابیاں کی آخیا، ”مہاڑی بہوں سخت خواہش سی کہ دکھ سہنے توں پہلے اِس عیدی نا کھاٹا میں تُساں نال بیہی کے کھاں۔¹⁶ کیئانکہ میں تُساں کی دسی شوڑاں کہ عیدی نا اے کھاٹا میں اُس ویلے تک فر ناں کھاساں جیہڑے ویلے تک کہ اِس نا مقصد اللہ تعالیٰ نی بادشاہی وچ مکمل طور اپر پورا ناں ہووے۔“¹⁷ فر حضرت عیسیٰ کٹورا کِہنی کے اللہ تعالیٰ نا شکر ادا کیتا، تے فر اپنئے صحابیاں کی آخیا، ”اے کِہنو، تے سارے اِس وچوں پیؤ۔¹⁸ کیئانکہ میں تُساں کی

دسی شوڑاں کہ انگور نارس میں اُس ویلے تک فرِناں پیٹنا
جدوں تک اللہ تعالیٰ نی بادشاہی نا ویلا نا آئی جائے۔“

19 اِس تُوں بعد حضرت عیسیٰ روٹی کھندی، تے
اللہ تعالیٰ نا شکر ادا کری کے اُس نے ٹوٹے کیتے۔
فرِانہاں اپٹے صحابیاں کی دیٹے ویلے آخیا، ”اے
مہاڑا بدن اے جیہڑا تُساں نی خاطر میں دینا آں۔

مہاڑی یادگار نے طور اپر تُساں اِسے طرح کریا کرو۔“
20 اِسے طرح کھاٹا کھاٹے تُوں بعد اُنہاں انگوراں نی شراب
نا کٹورا کھندا تے صحابیاں کی آخیا، ”اے انگوراں نی
شراب نا کٹورا اللہ تعالیٰ نا نواں عہد اے، جیہڑا تُساں
واسطے مہاڑے بغائے وے خون نے ذریعے قائم کیتا

جاسی۔“ 21 پر اے گل یاد رَحو کہ جیہڑا بندہ مکی دُشمٹاں
کولوں پغڑاسی او وی مہاڑے نال بیہی کے کھاٹا پیا کھاٹا
اے۔ 22 اے گل تے سچ اے کہ ابنِ انسا نیعنی کہ میں
اللہ تعالیٰ نے حُکمے نال اِسے طرح مَرساں، پر اُس نمک
حرام اپر افسوس اے! جیہڑا اِس کَمے نا ذریعہ بٹسی۔“

23 اے گل سٹی کے صحابہ اک ڈوئے کولوں پُچھن لغے،
 ”اساں وچ ایئرے جھیا کُن ہوسی جیہڑا اے کم گرسی؟“

صحایاں نی اپنی عزت نے بارے وچ بحث

24 اسے دوران اُنہاں وچ اے بحث وی شروع ہوئی گئی کہ
 ’اساں وچوں بڑا درجہ کس نا اے؟‘ 25 حضرت عیسیٰ اُنہاں
 کی آخیا، ”مُشرک قوماں نے بادشاہ لوکاں اپر حکومت
 چلاٹے ان، اُنہاں کی کنٹرول کرنے ان تے لوکاں کولوں
 آپے کی خیرخواہ آخوٹے ان۔ 26 پر تُساں وچ اسرح نی
 ہونٹا چاہی نا، بلکہ جیہڑا تُساں وچ بڑا ہووے اسی ایئرے
 جھیا ہونٹا چاہی نا اے کہ او ساریاں کولوں نکا اے۔ تے
 جیہڑا حاکم بٹنا اے، اسی خادم نی طرح ہونٹا چاہی نا
 اے۔ 27 اصل وچ بڑا کُن اے؟ او جیہڑا خدمت کرنا اے
 یا او جیہڑا دسترخوان اپر کھاٹا کھاٹے واسطے بیہٹا اے؟
 بیشک او ہی جیہڑا کھاٹا کھاٹے واسطے بیہٹا اے۔ پر میں
 تُساں کول خدمت کرنے آئے نی طرح آن۔ 28 تُساں او ہی
 او جیہڑے مہاڑیاں ساریاں مُشکلاں نے دوران مہاڑے نال

گھلتے رہے او۔²⁹ اِس واسطے جِسرَح مہاڑے آسمانی باپ مکی بادشاہی کرنے نا اختیار دِتا اے میں وی تُساں کی اے اختیار دیساں،³⁰ تانکہ مہاڑی بادشاہی وِچ تُساں وی مہاڑے نال کھاؤ پیؤ بلکہ تُساں شاہی تختاں اپر بیہی کے بنی اسرائیل نے باراں قبیلیاں نا انصاف کرو۔“

حضرت عیسیٰ نی پطرس نے انکار نی پیشنگوئی

³¹ فر حضرت عیسیٰ آخیا، ”شمعون، شمعون! سُن! شیطان تُساں ساریاں کی کٹکاں نی طرح چھاننے واسطے اجازت چائی کہندی اے۔³² پر میں تہاڑے واسطے دُعا کیتی اے کہ تہاڑا ایمان ختم ناں ہووے۔ اِس واسطے جیہڑے ویلے توں مہاڑے دَر فِر مڑی کے اچھیں، تے اپٹے انہاں پہراواں نے ایمان کی وی مضبوط کریاں۔“

³³ پر حضرت شمعون جنہاں کی پطرس وی آخٹے ہوئے سُن، حضرت عیسیٰ کی جواب دِتا، ”حضور، میں تُساں نال جیل جاٹے واسطے بلکہ مرنے واسطے وی تیار آں!“

34 اے گل سٹی کے حضرت عیسیٰ انہاں کی جواب دتا،
 ”پطرس، یاد رخ! آج سرگی ویلے کُکڑے نی بانگاں کولوں
 پہلے تُوں ترے واری مکی سیانٹے تُوں وی انکار کرسیں۔“
 35 فر حضرت عیسیٰ صحابیاں کی آخیا، ”جس ویلے میں
 تُساں کی بٹوے، تھیلے ترے فالتو بُوٹاں تُوں بغیر پہیجیا
 سی، ترے تُساں کی کُسے چیز نی کمّی ہوئی سی؟“
 انہاں جواب دتا، ”ناں جی!“

36 فر حضرت عیسیٰ انہاں کی آخیا، ”پرہن جس کُسے
 کول بٹواتے تھیلا آے وے، او اُسی اپنے نال کِہنی گھڑے۔
 ترے جس کُسے کول تلوار نی، او اپنا کوٹ وی بیچی کے
 تلوار خریدی کہنے! 37 کیئانکہ میں تُساں کی دسی شوڑٹا
 آن کہ مہاڑے بارے وچ جیہڑی پیشنگوئی ہوئی وی آے کہ
 ’اُس نا شمار غنہگاراں وچ کیتا گیا‘ او ضرور پوری ہوسی
 ۔ کیئانکہ ہر گل جیہڑی صحائف الانبیاء وچ مہاڑے
 بارے وچ لُخی گئی آے، او ہن پوری ہوئے آلی آے۔“
 38 صحابیاں آخیا، ”حضور، تکو! آساں کول دو تلواراں اٹ۔“
 حضرت عیسیٰ آخیا، ”بس کرو!“

حضرت عیسیٰ کوہِ زیتون پر دُعا کرنے اُن

39 فر اسرح ہویا کہ حضرت عیسیٰ معمول نے مطابق
اپنے صحابیوں کی کہنی کے کوہِ زیتون پر ٹری گئے۔
40 اُتھے جائی کے حضرت عیسیٰ صحابیوں کی آخیا،
”دُعا کرو کہ تْساں کُسے آزمائشِ وچ ناں پیؤ۔“ 41 فر
حضرت عیسیٰ اُنہاں کولوں تھوڑی دُور گئے تقریباً اتنا
کُجھ دُور جتنا کوئی بٹہ سٹی سکے، تے گوڈیاں پار
بیہی کے اللہ تعالیٰ اگے اسرح دُعا کرنے رہے، 42 ”اے
باپ، اگر تُوں چاہیں، تے مکی اس مصیبت کولوں بچا۔
پر اے گل مہاڑی مرضی نال ناں ہووے بلکہ تھہاڑی
ہی رضا نال پُوری ہووے۔“ 43 اس گل تُوں بعد آسمان
وچوں اک فرشتہ نازل ہویا، تے اُس حضرت عیسیٰ نی
ہمت ودھائی۔ 44 پر حضرت عیسیٰ سخت پریشان ہوئے
وے سن۔ اُنہاں ہور زیادہ فریاداں نال اللہ تعالیٰ اگے
دُعا کیتی۔ تے اُنہاں نا پرسو زیمی اپر اسرح پیا ٹھہیٹا
سی جسرح خون نے بڑے بڑے قطرے پئے ٹھہیٹے ہون۔

45 جیہڑے ویلے حضرت عیسیٰ دُعا ختم کیتی، تے اُٹھی کے صحابیاں کول آئے، تے تکیا کہ او پریشانی نے عالم وچ ہی سیئی گئے سن۔ 46 حضرت عیسیٰ اُنہاں کی آخیا، ”تساں کیئاں سترے وے او؟ اُٹھو تے دُعا کرو تانکہ تساں اپر کوئی آزمائش ناں اچھے۔“

حضرت عیسیٰ نی گرفتاری

47 حضرت عیسیٰ اے گلاں کرنے ہی سن کہ بہوں سارے لوک اُتھے آئی گئے۔ یہوداہ اسگریوتی جیہڑا کہ اُنہاں نے باران صحابیاں وچوں سی لوکاں کی اُتھے کہنی کے آیا سی۔ او حضرت عیسیٰ کول گیا تانکہ متھے اپر پیار دے۔ 48 پر حضرت عیسیٰ اسی آخیا، ”یہوداہ، گے گل اے؟ توں ابنِ انسان کی پَنڈرائے واسطے پیار کرنا این؟“

49 جیہڑے ویلے حضرت عیسیٰ نے صحابیاں تکیا کہ گے ہوئے آلا اے، تے اُنہاں پُچھیا، ”حضور، اِنہاں نال لڑائی کراں؟ آساں کول تلواراں تے ہیں اِن۔“ 50 فر اِک صحابی اپنی تلوارے نال ساریاں توں بڑے

مذہبی پیشوا نے نوکرے پر حملہ کیتا؟ تے اُس نا سجا
 گن کپی شوڑیا۔⁵¹ پر حضرت عیسیٰ آخیا، ”بس!
 بس کرو!“ اے آخی کے انہاں اُس بندے نے گتے
 نال اپٹا ہتھ مبارک لایا تے او ٹھیک ٹھاک ہوئی گیا۔
⁵² جیہڑے ویلے بڑے مذہبی پیشوا، بڑے عبادت خانے
 نی حفاظت کرنے آلمے سپاہیاں نے افسر، تے بنی
 اسرائیلیاں نے بڑے بدیرے حضرت عیسیٰ کی پغڑنے
 واسطے آئے وے سن، حضرت عیسیٰ انہاں لوکاں کی
 آخیا، ”تساں کیئاں مکی کوئی ڈاکو سمجھی کے
 تلواراں تے ڈنڈے کہنی کے آئے او؟⁵³ میں ہر روز
 بڑے عبادت خانے وچ تساں کول ہونا ساں، پر تساں
 اُس ویلے مکی پغڑنے نی کوشش نی کیتی۔ ہن تساں
 نا ویلا آئے، کیئانکہ اس ویلے نہیرے نا راج آئے۔“

حضرت پطرس حضرت عیسیٰ نا انکار کرنے ان

⁵⁴ فر او لوک حضرت عیسیٰ کی گرفتار کری کے ساریاں
 توں بڑے مذہبی پیشوا نے کہہار کہنی گئے۔ تے حضرت

پطرس دُوروں دُوروں اُنہاں نے پچھے پچھے گئے۔
 55 جیہڑے ویلے لوکاں اندر بیہڑے وچ آگ بالی، تے
 سارے اُس نے آسے پاسے بیہی گئے۔ حضرت پطرس
 وی اندر بیہڑے وچ جائی کے اُنہاں نال بیہی گئے۔
 56 اِک نوکرائی حضرت پطرس کی اگی کول
 بیٹھا وا تکیا، تے لوئی وچ غور نال تکی
 کے آخٹ لغی، ”اے وی عیسیٰ نال سی!“
 57 پر حضرت پطرس اے آخی کے انکار کری
 شوڑیا، ”بی بی، میں تے اسی سیانناں وی ناں!“
 58 تھوڑی دیر بعد اِک ہور بندے حضرت پطرس
 کی تکی کے آخیا، ”توں وی اُنہاں وچوں ہی این!“
 حضرت پطرس آخیا، ”ناں سنگیا، میں ناں!“
 59 تقریباً گھنٹے اِک بعد کُسے ہور بندے پُرزور انداز وچ
 آخیا، ”واقعی، اے بندہ وی اُس نال سی، کیئانکہ اے وی
 گلیل صوبے نارہن آلا اے!“ 60 پر حضرت پطرس آخٹ
 لغے، ”یرا، مکی نی پتہ توں کُس نے بارے وچ گلاں کرنا
 پیا این!“ جیہڑے ویلے او گلاں کرنے پئے سٹ، تے فراتنے

وچ کُکڑے بانگ چائی دتی۔⁶¹ حضرت عیسیٰ پچھے
 مڑی کے حضرت پطرس کی تکیا، تے حضرت پطرس کی
 او گل یاد آئی کہ حضرت عیسیٰ آخیا سی، ’آج کُکڑے نی
 بانگ ہوئے کولوں پہلے ترے واری توں مہاڑا انکار کرسیں۔‘
⁶² فر حضرت پطرس باہر جائی کے پھوٹی پھوٹی روئے۔

لوک حضرت عیسیٰ کی مارنے ان تے مزاح کرنے ان

⁶³ جیہڑے لوکاں حضرت عیسیٰ کی پغڑیا سی او
 انہاں کی مارنے سن تے انہاں نال مزاح کرنے سن۔
⁶⁴ مارنے ویلے او حضرت عیسیٰ نیاں اکھیاں اپر
 پٹی بٹی کے آخٹے سن، ”کوئی وحی آئی آے، تے
 دس! تکی کس ماریا؟“⁶⁵ اس توں علاوہ انہاں لوکاں
 حضرت عیسیٰ نی بہوں بے عزتی وی کیتی سی۔

حضرت عیسیٰ نی شریعت نی عدالت وچ پیشی

⁶⁶ اگلے دیہاڑے سویرے سویرے ہی بنی اسرائیلیاں نے
 بڑے بدیرے، بڑے مذہبی پیشوا تے شریعت نے عالم سارے

اکٹھے ہوئے، تے حضرت عیسیٰ کی شریعت نی عدالت
 وچ پیش کیتا۔⁶⁷ انہاں حضرت عیسیٰ کی آخیا، ”آساں
 کی دس، گے تُوں واقعی اللہ تعالیٰ نا پہیجیا وا مسیح ایس؟“
 حضرت عیسیٰ انہاں کی جواب دتا، ”کدے میں
 تُساں کی اے گل آخاں، تے تُساں یقین نی او کرن
 لغے۔⁶⁸ تے کدے میں تُساں کولوں اک سوال پُچھاں،
 تے تُساں جواب وی ناں دینِ لغے۔⁶⁹ پر ہُن تُوں بعد
 ابنِ انسان اللہ تعالیٰ نے سَجّے پاسے بیہی جاسی۔“
⁷⁰ اے گل سٹی کے انہاں ساریاں
 آخیا، ”فر تے تُوں اللہ تعالیٰ نا پتر ایس؟“
 حضرت عیسیٰ جواب دتا، ”تُساں
 آپوں اِس گل نا اقرار کرنے پئے او۔“
⁷¹ اے گل سٹی کے لوکاں آخیا، ”ہُن آساں کی
 کُسے نی گواہی نی کے لوڑ اے؟ آساں ساریاں
 آپوں اے کُفر اِس نے مونہے وچوں سٹی کھندا!“

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر
کیتا۔ اسان نا دلی مقصد اے کہ اس پیغام کی پھیلا یا جائے۔
اسان خوشی نال عیسیٰ المسیح نے بارے وچ تسان نال گل
کرساں، یا تسان نال دُعا کرساں، یا تسان نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>